

Minister Ramon Lee

Departamentonan social y cultural a uni pa organisa e di dos proyecto di “gang di arte”

ORANJESTAD-Departamento di Cultura (DCA), Departamento di Asunto Social (DAS) y Fundacion Desaroyo Educativo Comunitario (FDEC) ta invita tur hoben na Aruba entre 13 y 18 aña pa forma parti di e “Gang di Arte 2009” cu ta tuma lugar den luna di mei te juli 2009.

“Gang di Arte” ta un competencia artistico y creativo. E intencion ta pa e hobennan expresa nan mes creativamente, den e disciplina di nan escohencia, riba un escenario profesional y cu e oportunidad di representa Aruba den e evento di Cultura di Reino durante Weganan di Reino den luna di juli 2009. Participacion ta den grupo di maximo 5 integrante. Gruponan por scohe entre e categorianan musica, canto, baile, teatro, arte visual, video art, literatura (poesia y cuenta cortico), diseño y moda. Tur presentacion mester ta original y traha pa e hobennan mes cu ta bai ehecut’e. No ta acepta trabounan existente di otro persona. Cada grupo ta haya mas o menos 7 minuut pa nan presentacion.

Den luna di mei y juni 2009 e participantenan por atende na diferente tayernan pa prepara nan presentacion. Lo tin dos pre finale riba dianan 4 y 5 di juli 2009 den ‘Cristal Theatre’, tambe yama ‘Stardust Theatre’ pa saca e finalistanan.

E presentacion final di e competencia “Gang di Arte 2009” lo ta diadomingo 19 di juli den e mes un lugar y Aruba lo conoce su ganadornan.

Esaki ta pa desaroya y fortifica nan talento y capacidad. Meta tambe ta pa crea un colaboracion entre diferente paisnan den Reino y un interaccion entre e disciplinanan artistico.

Tur hoben cu ta creativo y ta posee talentonan scondi, ta entre 13 cu 18 aña di edad por inscribi. Inscripcion lo sera dia 20 di mei 2009. Lugar di inscripcion of pa haya mas informacion ta na Departamento di Cultura, J.E. Irausquinplein 2-A, telefoon 582-2185 of John Freddy Montoya na telefoon 5656903. Tur hoben bin participa y demostra loke boso por!

Fundacion Educativo Comunitario

Fundacion Desaroyo Educativo Comunitario (FDEC) conhuntamente cu Departamento di Cultura Aruba (DCA) y Departamento di Asunto Social (DAS) ta anuncia e proyecto “Gang di Arte 2009” dirigi na hobennan di Aruba.

“Gang di Arte” ta un proyecto cu ta cuadra cu e vision di e FDEC cual ta percura pa e desaroyo den forma educativo y comunitario. Den e caso aki hobennan ta haya e oportunidad

pa desaroya nan mes riba tereno artistico. FDEC ta traha pa varios aña caba den nos comunidad pa desaroya talento di hoben tanto riba tereno di musica, obra di man y pintura den diferente barionan di Aruba. Ademas FDEC ta promove e tradicion di nos instrumento cultural cual ta e caha di orgel.

Gang di Arte 2009 ta un proyecto cu ta brinda e oportunidad na hoben pa expresa y desaroya nan mes riba tereno artistico y cultural. E ta un di e proyectonan cu ta forma parti di e programa di actividad pa 2009 di FDEC. Ya pa di dos aña



consecutivo FDEC ta brindando su colaboracion pa asina hunto cu e otro instancianan haci “Gang di Arte” un exito. Pa e aña aki ta haci un apelacion na comerciantenan pa duna

nan aporte na e proyecto aki pa medio di patrosina. Pa duna aporte den forma di patrosinio por fabor tuma contacto cu sra. Elvira Maduro na telefoon: 5820010.